

P R E F A C E.

faicte, qu'ils estoient seulement de quatre doigts: De plus, dit il, n'est
 elongnée la vie de la mort de celuy qui avecques nauires flotte sus
 mer. Or mesieurs, pour auoir allegué tant d'excellens personnages,
 n'est que ie m'estime leur deuoir estre comparé, encor moins les éga-
 ler: mais ie me suis persuadé que la grandeur d'Alexandre, n'a em-
 pesché ses successeurs de tenter, voire iusques à l'extremité, la fortu-
 ne: aussi n'a le scauoir eminent de Platon iusques là intimidé Ari-
 stote, qu'il n'aye à son plaisir traicté de la Philosophie. Tout ainsi, à
 fin de n'estre veu oyseux & inutile entre les autres, non plus que
 Diogenes entre les Atheniens, j'ay bien voulu reduire par escrit plu-
 sieurs choses notables, que j'ay diligemment obseruées en ma navi-
 gation, entre le Midy & le Ponent: C'est à scauoir la situation &
 disposition des lieux, en quelque climat, zone, ou parallele que ce soit,
 tant de la marine, isles, & terre ferme, la temperature de l'air, les
 meurs & facons de viure des habitans, la forme & propriété des
 animaux terrestres, & marins: ensemble d'arbres, arbrisseaux, a-
 uec leurs fruits, mineraux & pierreries: le tout représenté viuement
 au naturel par portrait le plus exquis, qu'il m'a esté possible. Quant
 au reste, ie m'estimeray bien heureux, si il vous plaist de receuoir ce
 mien petit labeur, d'aussi bon cueur, que le vous presente: m'asseu-
 rant au surplus que chacun l'aura pour agreable, si bien il pense au
 grand travail de si longue & penible peregrination, qu'ay voulu
 entreprendre, pour à l'œil voir, & puis mettre en lumiere les choses
 plus memorables que ie y ay peu noter & recueillir, comme lon
 verra cy apres.